

# TULAFONO TAU FAAOFI O TEUTEUGA O LE TULAFONO O TULAGA O TAGATANUU 2016

## SAMOA

### Faamatalaga e Faamalamalama ai

#### Sini Autu ma Mafuaaga:

Ua talosagaina i le Tulafono Tau Faaofi le teuteuina o le Tulafono o Teuteuga o le Tulaga o Tagatanuu 2004 (“o le Tulafono”) ina ia aofia ai augatupulaga a Samoa o i latou ia e fananau mai i fafo e manaomia le avea ma tagatanuu e ala i le tupuaga.

#### Fuaiupu:

**Fuaiupu 1:** - ua taua ai e faapea, afai e pasia, o le a tatau loa ona taua le Tulafono Tau Faaofi o le Tulafono o Teuteuga o le Tulafono o Tulaga o Tagatanuu 2016, ma o le a amata faamamaluina i le aso e tuuina i ai le maliega a le O Le Ao o le Malo.

**Fuaiupu 2:** - ua teuteu ai le fuaiupu 7 o le Tulafono ina ia aofia ai augatupulaga o Samoa o i latou ia e fananau mai i fafo atu o Samoa o se tasi o matua sa avea ma tagatanuu po o matua o matua o se tagatanuu po o, sa avea ma tagatanuu o Samoa i le fanau mai.

**Fuaiupu 3:** - ua aiaia ai mo mataupu tau soloaiga ina ia aofia ai talosaga o lo o talia i le Matagaluega mo le pasia ai o le Tulafono Tau Faaofi.



(Hon TUILAEPA Auelua Fatialofa Lupesoliai Lolofietele  
Neioti Aiono Galumalemana Dr. Sailele Malielegaoi)

PALEMIA

## **TULAFONO TAU FAAOFI O TEUTEUGA O LE TULAFONO O TULAGA O TAGATANUU 2016**

### **SAMOA**

#### **Faatulagaina o Aiaiga**

1. Igoa puupuu ma le amataga
2. Ua teuteuina le fuaiupu 7
3. Aiaiga tau soloaiga

---

**2016, Nu.**

#### **O SE TULAFONO TAU FAAOFI UA TAUA**

**O SE TULAFONO** e teuteu ai le Tulafono o Tulaga o Tagatanuu 2004 (“Tulafono autu”).

**UA FAIA** e le Fono Aoao Faitulafono a Samoa i totonu o le Palemene ua potopoto e faapea:

**1. Igoa puupuu ma le amataga:**

- (1) E mafai ona taua lenei Tulafono o le Tulafono o Teuteuga o le Tulafono o Tulaga o Tagatanuu 2016.
- (2) O lenei Tulafono e amata faamamaluina i le aso e tuuina i ai le maliega a le O Le Ao o le Malo.

**2. Ua teuteuina le fuaiupu 7:**

Mo le fuaiupu 7 o le Tulafono autu i le faafuaiupu (1) mo “o se tasi o matua o se tagatanuu o Samoa” ia suia “a itiiti mai o se tasi o matua po o matua o matua o le tagata o se tagatanuu po o sa avea ma tagatanuu o Samoa”.

**3. Aiaiga tau soloaiga:**

E faaaogā le fuaiupu 7 o le Tulafono autu (e pei ona teuteuina e lenei Tulafono) i se tagata o ia lea na fanau i fafo atu o Samoa a o lumanai ai le amata faamamaluina o lenei Tulafono, ma o se tasi o ona matua sa po o se tasi o matua o ona matua o se tagatanuu o Samoa, po o se tasi o ona matua po o matua o ona matua ua ia faamalieina manaoga tau nofomau i lalo o le fuaiupu 7(1)(b) o le Tulafono autu.

---